



Jinsí Hámla

Yían kaanun or hélaf Australíat honíkka ré jinsí hámla goríbélla.

Jinsí hámla goréde manúic uggwá ziyól ót zaifare, tará uggwá morot óuk yá maiya óuk.

Zodi tuñí yá tuñí zanodé honíkka hótarat táke **000** nombór ót fulic dhako.

Australíar fulic héfazot óla ar biccác gorífare.

Maana, húfia mocuwara gorá arde malumat ókkol ólla 1800RESPECT óre dhako **1800 737 732** nombór ót.

Zodi tuáñrtu maana torjuma goróya ekzon lage **131 450** ot dhako.

Australíar Hókumot (Australian Government) e jinsí hámla re zehonó háalot ókkol ót bordac nogoré.

Jinsí hámla ré tarár morzi sára oinno manúic uggwár íkka dahái diyaza. Pathnár, bou-zamai yá fémlí membór óre jinsí hámla goróon kaanun or uldha.

Jinsí hámlat cámil tákede:

- honíkka ré zená goríbélla yáto zenár karwaiyi ókkol goríbélla bolazuri goróon;
- honíkka ré lendha jiníc saáibélla mojburi goróon; yáto
- fua uggwá loi zená goróon yá zenár karwaiyi ókkol goróon.

Maiya ókkol óttu morot or dhóil ekkú dhoilla hók asé.

Australíat aséde kaanun ókkol é maiya arde morot ókkol óre borabor bebaár goré.

Fottízon ottú gom lagibélla arde tarár fémlí ókkol, dustó ókkol arde adoijja ókkol lói héfazoti taaluk óibella hók asé. Maramari honódin sóiyi noó. Honíkkar tú nuksan gorérde yían kobul goróon no saá. . Maiya ókkol óttu hóraf bebaár yá duk faa kobul gorá no foribóu.

Australíat salsolon ot arháí nofaréde hédmot ókkol asé ziyán é modot gorífare.

1800RESPECT óilde Australíar Koumi Jíns ór Hámla, Fémlí arde Góror bútoror Maramarir Mocuwara hédmot (Australia's national sexual assault, family and domestic violence counselling service). Yían é kúfia telefún ar onláin mocuwara arde malumat ókkol maana de. Mocuwara douya ókkol é tuáñr hotá fúnibou, súal ókkol ór zuab dibou ar tuáñr mahállí zagat aséde oinno modot or hédmot ókkol ór éçe háwala gorí faribóu.

1800 737 732 nombór ót dhako yá **1800RESPECT** wébsáith ot zo **www.1800RESPECT.org.au**.

Tuáñrtu torjuma goróya ekzon lagibóu né?

Torjuma arde Hotá báñgidiyar Hédmot (Translating and Interpreting Service) ot koól goró (TIS) **131 450** nombór ót. TIS óttu hotá báñgidouya ekzon e tuáñre modot gorí faribóu oinno hédmot ókkol lói taaluk goríbélla, mogor TIS é mocuwara diya nogoré. Koól beggún maana ar gufoniya.